

**BOSNA I HERCEGOVINA  
FEDERACIJA BOSNE I HERCEGOVINE  
UNSKO-SANSKI KANTON  
GRAD BIHAĆ  
GRADONAČELNIK**

Služba za strateško planiranje, upravljanje projektima,  
komunalne djelatnosti, vode i zaštitu okoliša

Broj: 04/3-24- /21

Bihać, 2021.godine

Na osnovu člana 52. tačka b) Statuta Grada Bihaća ("Službeni glasnik Grada Bihaća", broj: 13/15 i 13/18) i člana 183. stav (2) Poslovnika Gradskog vijeća ("Službeni glasnik Grada Bihaća", broj: 3/16, 4/20), Gradonačelnik u svojstvu predlagača propisa i drugih akata:

**O d r e đ u j e**

Izvjestioca: Vildanu Zulić, pomoćnik gradonačelnika za strateško planiranje, upravljanje projektima, komunalne djelatnosti, vode i zaštitu okoliša, na sjednici Gradskog vijeća i radnim tijelima po prijedlogu tačke dnevnog reda:

Nacrt Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa.

Gradonačelnik  
Šuhret Fazlić

**BOSNA I HERCEGOVINA  
FEDERACIJA BOSNE I HERCEGOVINE  
UNSKO – SANSKI KANTON  
GRAD BIHAĆ  
GRADONAČELNIK**

Služba za strateško planiranje, upravljanje projektima,  
komunalne djelatnosti, vode i zaštitu okoliša

Broj: 04/3-24- /21

Bihać, 19.10.2021.godine

Gradsko vijeće Bihać

-ovdje-

**PREDMET:** Nacrt Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa, dostavlja se

Na osnovu člana 52. Statuta Grada Bihać („Službeni glasnik Grada Bihaća“ broj: 13/15, 13/18) i člana 140. Poslovnika Gradskog vijeća (“Službeni glasnik Grada Bihaća”, broj: 3/16), dostavljamo Vam na razmatranje radi donošenja Nacrta Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa.

***Pravni osnov za donošenje:***

Pravni osnov za donošenje predloženog Nacrta Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa sadržan je u:

- članu 12. stav (3) tačka (z) Zakona o lokalnoj samoupravi Unsko-sanskog kantona („Službeni glasnik Unsko-sanskog kantona“, broj: 8/11), koji propisuje da: „U vlastite nadležnosti jedinice lokalne samouprave posebno spadaju, između ostalog i zaštita životinja.“
- članu 35. tačka c) Statuta Grada Bihaća (“Službeni glasnik Grada Bihaća”, broj: 13/15, 13/18), kojim je propisano da Gradsko vijeće, u okviru svoje nadležnosti, donosi odluke i druge opće akte kojima uređuje pitanja iz samoupravnog djelokruga Grada i daje njihovo tumačenje.

***Razlozi za donošenje:***

Grad Bihać je donio dokument „Plan zbrinjavanja pasa lotalica u gradu Bihaću“, broj: 04/3-04-3032/21 od 04.06.2021.godine, čiji je opći cilj uspostaviti efikasan i human sistem za upravljanje populacijom pasa lotalica koji će osigurati sigurnost i zadovoljstvo građana Grada Bihaća. Kako bi se pitanje pasa lotalica stavilo pod kontrolu potrebno je pronaći sistemsko rješenje za upravljanje populacijom pasa koje imati dva potcilja, a to su u kratkom vremenu smanjiti broj pasa lotalica na području grada Bihaća i spriječiti ponovno povećanje broja napuštenih pasa promoviranjem principa odgovornog vlasništva.

Naime, problem pasa lotalica i problem vlasničkih pasa koji povremeno nisu pod nadzorom predstavlja problem svih gradova i općina u Bosni i Hercegovini. U posljednjih 20 godina problem se dodatno usložio zbog neprovođenja zakonskih propisa koji reguliraju oblast zaštite, držanja i zbrinjavanja pasa.

Izvori populacije pasa lotalica su između ostalih slijedeći: napuštanje od strane vlasnika, napuštanje štenaca od strane uzgajivača za koje procijene da su neodgovarajući za planiranu namjenu, lutajući nesterilizirani vlasnički psi koji doprinose reproduktivnom potencijalu napuštenih životinja, namjensko dovoženje pasa sa područja drugih gradova i općina i ostavljanje istih na području grada Bihaća i slično.

Odgovornost za veliki broj napuštenih pasa na ulicama bosanskohercegovačkih gradova snose vlasti, ali činjenica je da je uzrok problema u neodgovornim vlasnicima pasa koji ih napuštaju, kao i u onim vlasnicima koji puštaju svoje pse da povremeno lutaju gradom bez nadzora.

Do sada su na području grada Bihaća osim osnivanja Privremenog skloništa za pse, provedene brojne akcije uklanjanja pasa lotalica sa područja grada, koje, osim kratkotrajnog rješenja, nisu dale dugoročan rezultat, što zbog ograničenog kapaciteta skloništa, što zbog stalnog priliva novih napuštenih pasa. Također je provedena ograničena kampanja kontrole odgovornog vlasništva koja, nažalost, nije prerasla u kontinuiranu aktivnost.

Procjena je da još uvijek postoji veliki broj vlasničkih pasa koji nisu popisani i čipirani.

Dodatni problem predstavlja i to što psi lotalice ne poznaju općinske granice tako da se slobodno kreću unutar više općina, kao i ciljano dovoženje pasa iz drugih općina koje nemaju nikakav vid zbrinjavanja pasa lotalica osim povremenog odstrela.

Nadalje, u prigradskim naseljima, a posebno seoskim, postoji problem nomadenja stoke gdje pastiri iz raznoraznih razloga ostavljaju velike ovčarske pse koji se udružuju u čopore i predstavljaju ozbiljnu prijetnju po život stanovništva. Također, nije rijetka pojava da lovci nezadovoljni svojim psima iste samo ostave.

Zbog svega navedenog ogromno je nezadovoljstvo građana koji nerijetko postaju žrtve napada pasa lotalica.

Međutim, činjenica je da postoji i veliki broj napuštenih pasa/lotalica koji su prijateljski nastrojeni pa čak i željni ljudske pažnje usprkos lošim životnim uvjetima, što govori u prilog tvrdnji, a i propisi to nalažu, da se mora osigurati humani pristup u rješavanju ovog pitanja.

Od 2012. godine Grad Bihać ima Privremeno sklonište za pse sa područja grada Bihaća, ali istim nisu zadovoljne niti vlasti Grada Bihaća, niti udruženja koja se bave zaštitom životinja. Za navedeno ima više razloga, a osnovni su mali kapacitet skloništa, kao i nedovoljna financijska sredstva da bi isto preraslo u azil za životinje.

Nadalje, potrebno je razmotriti i donijeti odluku da se udruženja koja se bave zaštitom životinja financijski podrže u aktivnostima zbrinjavanja pasa lotalica ili mogućnost davanja gradskog zemljišta kako bi ista otvorila i držala skloništa za napuštene i izgubljene pse.

U donesenom „Planu zbrinjavanja pasa lotalica u gradu Bihaću“ u tački 2.6. Privremenih mjera Plana navedeno je da je potrebno:

„Izmijeniti i dopuniti Odluku o načinu držanja i zaštiti pasa i mačaka kao kućnih ljubimaca na način da se omogući pravnim i fizičkim licima udomljavanje većeg broja napuštenih pasa i/ili pasa lotalica koje mogu držati u porodičnoj kući ili dvorištu porodične kuće, kao i mogućnost da ih Grad može u skladu sa svojim finansijskim mogućnostima podržati“.

Nadalje, Grad Bihać ima donesenu Odluku o načinu držanja i zaštiti pasa i mačaka kao kućnih ljubimaca (“Službeni glasnik općine Bihać”, broj: 07/17, 13/17). Međutim kako se radi o izmjenama koje podrazumijevaju dopunu naziva Odluke, te je izmijenjeno više od 50% članova, pristupilo se izradi novog propisa.

I na kraju, nakon što je urađen Nacrt Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa isti je prije upućivanja u Gradsko vijeće Grada Bihaća dostavljen na konsultacije JP Veterinarskoj stanici d.o.o. Bihać, Službi za inspeksijske poslove, Službi za financije, privredu i poljoprivredu, Sekretaru Gradskog organa uprave i jedinom Udruženju za zaštitu životinja registriranim na području Grada Bihaća „Šapa na srcu.“ Povratnu informaciju dostavili su: Sekretar Gradskog organa uprave, Služba za inspeksijske poslove i Udruženje „Šapa na srcu“ Bihać.

U skladu sa navedenim, urađen je Nacrt Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa.

***Potrebna finansijska sredstva:***

Za implementaciju člana 21. i člana 24. Nacrta Odluke potrebno je u Budžetu Grada Bihaća za 2022. godinu obezbijediti finansijska sredstva.

Imajući u vidu gore navedeno, predlaže se Gradskom vijeću Bihać da usvoji Nacrt Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa kao u predloženom tekstu.

**Prilozi:**

- Nacrt Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa
- Zaključak o prihvatanju Nacrta Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa
- Odluku o načinu držanja i zaštiti pasa i mačaka kao kućnih ljubimaca, (“Službeni glasnik Grada Bihaća”, broj: 7/17, 13/17)

Gradonačelnik  
Šuhret Fazlić

Na osnovu člana 132. tačka a) i člana 142. Poslovnika Gradskog vijeća Bihać (“Službeni glasnik Grada Bihaća”, broj: 3/16, 4/20), Gradsko vijeće Bihać na \_\_\_\_\_ sjednici održanoj dana \_\_\_\_\_2021. godine, donijelo je:

## ZAKLJUČAK

### o prihvatanju

Nacrta Odluke o načinu držanja i zaštiti pasa i mačaka kao kućnih ljubimaca,  
i napuštenih i izgubljenih pasa

#### I

Prihvata se Nacrt Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa (u daljem tekstu: Nacrt Odluke).

#### II

Nacrt Odluke stavit će se na javni uvid građanima u periodu od \_\_\_\_\_godine do \_\_\_\_\_godine, i to : u prostorijama Grada Bihaća – Info pult (šalter sala) i prostorijama Službe za strateško planiranje, upravljanje projektima, komunalne djelatnosti, vode i zaštitu okoliša (kancelarija Pomoćnika službe), u vremenu od 10:00 sati do 12:00 sati, objavom na web stranici Grada Bihaća, te dostavljanjem Nacrta Odluke JP Veterinarskoj stanici d.o.o. Bihać, Veterinarskoj inspekciji USK-a, JP „Komrad“ d.o.o. Bihać, Policijskoj upravi Bihać, svim mjesnim zajednicama grada Bihaća i drugim pravnim licima.

#### III

Prijedlozi, mišljenja i sugestije na Nacrt Odluke mogu se dostaviti u pismenoj formi do \_\_\_\_\_ godine, radnom tijelu Gradskog vijeća kojeg čine:

1. \_\_\_\_\_, predsjednik (ispred Gradskog vijeća Bihać),
2. \_\_\_\_\_, član (ispred Gradskog vijeća Bihać),
3. \_\_\_\_\_, član (ispred Službe za strateško planiranje, upravljanje projektima, komunalne djelatnosti, vode i zaštitu okoliša),
4. \_\_\_\_\_, član (ispred Službe za strateško planiranje, upravljanje projektima, komunalne djelatnosti, vode i zaštitu okoliša),
5. \_\_\_\_\_, član (ispred JP Veterinarska stanica d.o.o. Bihać).

#### IV

Radno tijelo za provođenje javne rasprave dužno je naročito:

- osigurati da materijal, odnosno Nacrt Odluke, koja je predmet javne rasprave, bude dostupan javnosti,
- pratiti javnu raspravu i pravovremeno prikupiti sve prijedloge, mišljenja i primjedbe koje se iznesu na javnoj raspravi,

- analizirati rezultate javne rasprave i o njima podnijeti izvještaj Vijeću i predlagачu materijala, odnosno učestvovati u završnoj javnoj raspravi.

#### V

Radno tijelo za provođenje javne rasprave održat će završnu javnu raspravu dana \_\_\_\_\_. godine u Vijećnici Grada Bihaća s početkom u 10:00 sati.

#### VI

Predlagач će, uzimajući u obzir prijedloge i mišljenja sadržane u izvještaju radnog tijela za provođenje javne rasprave, utvrditi Prijedlog Odluke o načinu držanja i zaštiti pasa i mačaka kao kućnih ljubimaca, i napuštenih i izgubljenih pasa i podnijeti ga Gradskom vijeću na razmatranje i donošenje.

#### VII

Zaključak stupa na snagu osmog dana od dana objavljivanja u „Službenom glasniku Grada Bihaća“.

Gradsko vijeće

Broj:

Bihać, \_\_\_\_2021. godine

Predsjedavajući Gradskog vijeća

Zulfikar Handukić

## **NACRT**

Na osnovu člana 12. stav (3) tačka z) Zakona o lokalnoj samoupravi Unsko-sanskog kantona („Službeni glasnik Unsko-sanskog kantona“, broj: 8/11) i člana 35. tačka c) Statuta Grada Bihaća („Službeni glasnik Grada Bihaća“, broj: 13/15 i 13/18), Gradsko vijeće Bihać, na \_\_\_sjednici održanoj dana \_\_\_\_\_2021.godine, donosi:

## **ODLUKU O NAČINU DRŽANJA I ZAŠTITI PASA I MAČAKA KAO KUĆNIH LJUBIMACA, I NAPUŠTENIH I IZGUBLJENIH PASA**

### **DIO PRVI - OPĆE ODREDBE**

#### **Član 1.**

##### **( Predmet Odluke)**

- (1) Odlukom o načinu držanja i zaštiti pasa i mačaka kao kućnih ljubimaca i napuštenih i izgubljenih pasa (u daljem tekstu: Odluka) propisuju se uslovi, način držanja i zaštita pasa i mačaka kao kućnih ljubimaca, registracija i način kontrole njihovog razmnožavanja, kretanje u objektima i na javnim površinama, način postupanja sa neregistriranim, napuštenim i izgubljenim psima, nadzor, kaznene, prelazne i završne odredbe.
- (2) Ovom Odlukom naročito se propisuje broj i način držanja pasa i mačaka, registracija, obilježavanje, preventivna cijepljenja, kao i način uklanjanja pasa i mačaka s ciljem zaštite zdravlja ljudi, sigurnosti građana i zaštite životne sredine.

#### **Član 2.**

##### **(Držanje kućnih ljubimaca u skladu sa Odlukom)**

Na području grada Bihaća mogu se u skladu sa ovom Odlukom držati kućni ljubimci koji ne ugrožavaju fizički i psihički integritet, ličnu sigurnost i imovinu građana, ne remete javni red i mir, ne izazivaju osjećaj straha, pri čemu uslovi držanja moraju u potpunosti zadovoljavati njihovu dobrobit.

#### **Član 3.**

##### **(Primjena Odluke)**

Odredbe ove Odluke ne odnose se na životinje koje služe za potrebe Ministarstva unutrašnjih poslova i Ministarstva odbrane BiH, službene pse i pse vodiče lica sa posebnim

potrebama koji su registrovani i pod nadzorom vlasnika.

#### **Član 4.**

##### **(Značenje pojmova)**

Pojedini pojmovi navedeni u Odluci imaju sljedeća značenja:

- a) pod kućnim ljubimcima, u smislu ove Odluke, podrazumijevaju se psi i mačke koje čovjek drži zbog društva, zaštite i pomoći ili zbog zanimanja za te životinje;
- b) imalac ili vlasnik životinje je fizičko ili pravno lice koje je vlasnik životinje, ili bilo koje drugo lice koje je stalno ili povremeno:
  - 1) vlasnik životinje;
  - 2) odgovorno ili zaduženo za životinju;
  - 3) odgovorno za čuvanje i kontrolu djece mlađe od 16 godina koja imaju životinju, odnosno koja se bave uzgajanjem, zaštitom, upotrebom, gajenjem, upravljanjem, obučavanjem, prijevozom ili prodajom životinje;
- c) izgubljena životinja je ona životinja koja je napustila vlasnika bez njegove volje i on je traži;
- d) napuštena životinja je kućna životinja koju je vlasnik svjesno napustio;
- e) psi i mačke lualice su životinje kojima je vlasnik nepoznat;
- f) opasan pas je bilo koja jedinka te vrste, koja je ničim izazvana, napala čovjeka ili drugu životinju i nanijela im fizičke povrede;
- g) neupisan pas je pas poznatog ili nepoznatog vlasnika/imaoca koji nije upisan u registar životinja u skladu sa zakonom;
- h) higijenski servis je služba za prikupljanje napuštenih, izgubljenih i uginulih životinja, koji osnivaju pravna lica u skladu s odredbama Zakona o zaštiti i dobrobiti životinja;
- i) skloništa za životinje su prostori u kojima se smještaju pronađene (napuštene i izgubljene) životinje na daljnju brigu i moguće udomljavanje.

## **DIO DRUGI - USLOVI, NAČIN DRŽANJA I ZAŠTITA KUĆNIH LJUBIMACA**

#### **Član 5.**

##### **(Primjena i pridržavanje zakonskih odredbi)**

- (1) Kućne ljubimce na području grada Bihaća može držati svako punoljetno lice u skladu sa odredbama Zakona o zaštiti i dobrobiti životinja („Službeni glasnik BiH“, broj: 25/09), Pravilnika o identifikaciji i vođenju evidencije pasa, mačaka i pitomih vretica u BiH („Službeni glasnik BiH“, broj: 96/16), Pravilnika o zaštiti pasa koji se drže kao kućni ljubimci („Službeni glasnik BiH“, broj: 18/12) i ove Odluke.
- (2) Držanje opasnih životinja kao kućnih ljubimaca regulirano je Pravilnikom o držanju opasnih životinja („Službeni glasnik Bosne i Hercegovine“ broj 27/10).



## **Član 6.**

### **(Isprava o upisu kućnog ljubimca)**

- (1) Na području grada Bihaća dozvoljeno je držati kućnog ljubimca koji je identificiran (označen pomoću mikročipa), evidentiran i upisan u registar životinja (baza podataka) i cijepljen kod ovlaštene veterinarske organizacije, u skladu sa Pravilnikom o identifikaciji i vođenju evidencije pasa, mačaka i pitomih vretica u BiH.
- (2) Zabranjeno je držati psa koji nije identificiran, evidentiran i upisan u registar životinja (baza podataka) kod ovlaštene veterinarske organizacije.
- (3) Vlasnik kućnog ljubimca mora imati propisanu ispravu o upisu kućnog ljubimca kod ovlaštene veterinarske organizacije koja vodi registar životinja, a koju je na zahtjev veterinarskog inspektora, komunalnog inspektora, komunalnog redara ili drugog službenog lica dužan pokazati.

## **Član 7.**

### **(Vođenje brige o kućnom ljubimcu)**

- (1) Vlasnik kućnog ljubimca dužan je brinuti o njegovom zdravlju, ishrani, smještaju, higijeni, i prema njemu postupati u skladu sa Zakonom i drugim propisima o zaštiti i dobrobiti životinja, veterinarstvu, zaštiti okoliša, javnom redu i miru te odredbama ove Odluke.
- (2) Vlasnik kućnog ljubimca koji se više o njemu ne može brinuti u skladu sa stavom (1) ovog člana dužan je pronaći udomitelja, odnosno udruženje građana ili lice koje će o njemu brinuti na propisan način ili ga predati skloništu za životinje, kojeg u skladu sa Zakonom osniva fizičko ili pravno lice, općina, grad, kanton ili entitet te je dužan snositi troškove boravka do udomljenja ili drugog načina zbrinjavanja životinje.

## **Član 8.**

### **(Dužnosti vlasnika kućnog ljubimca)**

- (1) Vlasnik kućnog ljubimca dužan je osigurati da kućni ljubimac ni na jedan način ne ometa javni red i mir, uslove stanovanja, utvrđeni kućni red i mir građana, te da ne ugrožava sigurnost građana i sigurnost drugih životinja.
- (2) U slučaju odsutnosti duže od 24 sata vlasnik je dužan osigurati nadzor i brigu punoljetnog lica za svog kućnog ljubimca u skladu sa njegovim potrebama.

## **Član 9.**

### **(Dužnosti vlasnika kućnog ljubimca u stambenim zgradama)**

- (1) Nije dozvoljeno držati ili ostavljati kućnog ljubimca u zajedničkim prostorijama stambene zgrade (ulazi, stubišta, liftovi, podrumi, prostorije za odlaganje smeća, kotlovnice, sušionice i slično).
- (2) Za držanje kućnog ljubimca u zajedničkom dvorištu stambene zgrade ili zgrada, vlasnik mora imati saglasnost svih suvlasnika ili vlasnika stambene zgrade ili drugog

zakonskog posjednika dvorišta.

- (3) Vlasnik kućnog ljubimca dužan je brinuti o čistoći zajedničkih prostorija stambene zgrade kojima se kreću kućni ljubimci, te očistiti površinu ukoliko je njegov kućni ljubimac na bilo koji način onečistio površinu.

#### **Član 10.**

##### **(Dozvoljeni broj kućnih ljubimaca u stanu)**

- (1) U stambenoj zgradi sa više stanova dozvoljeno je držanje u stanu najviše jednog (1) psa i dvije (2) mačke.
- (2) Štenad odnosno mačići mogu se držati najduže tri (3) mjeseca nakon okota.
- (3) Nije dozvoljeno držanje psa ili mačke na balkonu, terasi ili lođi stambene zgrade sa više stanova.

#### **Član 11.**

##### **(Dozvoljeni broj kućnih ljubimaca u kući ili dvorištu)**

- (1) U porodičnoj kući dozvoljeno je držati najviše dva (2) psa i dvije (2) mačke na način da ne ometaju red i mir građana.
  - a) u dvorištu porodične kuće, u užem urbanom području i zonama guste izgradnje izvan urbanog područja grada Bihaća, dozvoljeno je držati najviše jednog (1) psa i dvije (2) mačke, uz uvjet da se poštuju prava vlasnika susjednih nekretnina, zakona i ove Odluke.
  - b) u ostalim izgrađenim naseljima grada Bihaća dozvoljeno je držati najviše dva (2) psa i dvije (2) mačke, pod uvjetima propisanim ovom Odlukom i na način da se ne ometa red i mir građana.
- (2) Izvan izgrađenih naselja grada Bihaća dozvoljeno je držati više od dva (2) psa i dvije (2) mačke ukoliko vlasnik/imalac životinje obavlja djelatnost:
  - a) registrirano leglo za reprodukciju pasa i mačaka
  - b) ako vrši uzgoj podmlatka
  - c) ako posjeduje stado ovaca (na sto grla jedan ovčarski pas)
  - d) ako vrši dresuru pasa
  - e) ako organizira izložbe, smotre i takmičenja pasa i mačaka
  - f) ako je aktivni član lovačke organizacije, i posjeduju lovačke pse koji su upisani u evidencijsku knjigu nadležne lovačke organizacije.
- (3) Za obavljanje djelatnosti iz stava (2) ovog člana, vlasnik/imalac mora imati odobrenje nadležnog organa.

#### **Član 12.**

##### **(Držanje psa u ograđenom i neograđenom prostoru)**

- (1) Ukoliko se pas drži u ograđenom prostoru za psa ili kućici za psa, smještaj kućice ili ograđenog prostora mora biti takav da ne ometa stanovanje u susjednom dvorištu.

Kućica ili prostor za držanje psa mora biti udaljena najmanje 1,5 metar od međe sa susjednim posjedom.

- (2) Pas koji se drži u ograđenom dvorištu, okućnici ili drugom zemljištu ne mora biti vezan ukoliko ograda visinom i čvrstoćom osigurava sigurnost prolaznika i susjeda, na ulaznim dvorišnim vratima mora biti zvono u ispravnom stanju, te na vidnom mjestu istaknuta oznaka koja upozorava na prisustvo psa.
- (3) Pas koji se drži u neograđenom dvorištu mora biti vezan lancem u skladu s odredbama Pravilnika o zaštiti pasa koji se drže kao kućni ljubimci i na način da ne ometa kretanje i sigurnost građana ili biti smješten u ograđeni prostor - boks, koji će osigurati životinji da se samostalno ne može udaljiti.
- (4) Ostali uslovi držanja pasa se primjenjuju u skladu sa Pravilnikom o zaštiti pasa koji se drže kao kućni ljubimci.

### **Član 13.**

#### **(Poduzimanje mjera pri uznemiravanju građana lavežom ili zavijanjem psa)**

Vlasnik čiji pas učestalim i dugotrajnim lajanjem ili zavijanjem remeti mir građana, obavezan je po pritužbi građana odmah poduzeti odgovarajuće mjere kako bi se spriječilo daljnje uznemiravanje građana ili je dužan odmah umiriti psa na način koji životinji neće uzrokovati bol, patnju ili strah.

## **DIO TREĆI - REGISTRACIJA I NAČIN KONTROLE RAZMNOŽAVANJA KUĆNIH LJUBIMACA**

### **Član 14.**

#### **(Registracija i cijepljenje kućnih ljubimaca)**

- (1) Dozvoljeno je držanje kućnih ljubimaca koji su identificirani (označeni pomoću mikročipa), evidentirani i upisani u registar (bazu podataka) i cijepljeni.
- (2) Registraciju, označavanje pomoću mikročipa, cijepljenje i provođenje drugih propisanih veterinarsko-zdravstvenih mjera, u skladu sa Zakonom o veterinarstvu i Zakonom o dobrobiti životinja, provode ovlaštene veterinarske organizacije.
- (3) Ovlaštene veterinarske organizacije vode upisnike životinja i izdaju službenu ispravu za životinju, u skladu sa Pravilnikom o identifikaciji i vođenju evidencije pasa, mačaka i pitomih vretica u BiH („Službeni glasnik BiH“, broj: 96/16).
- (4) Vlasnici pasa dužni su prijaviti nabavku, odnosno uginuće ili otuđenje psa u roku od 7 dana od dana nabavke, uginuća ili otuđenja psa veterinarskoj organizaciji koja vodi upisnik.
- (5) Troškove registracije kućnih ljubimaca, označavanja – čipovanja, provođenja propisanih veterinarsko-zdravstvenih mjera i izdavanja službenih isprava /dokumentacije, snosi vlasnik u skladu sa Zakonom o veterinarstvu (“Službene

novine Federacije BiH” broj: 46/00).

### **Član 15.**

#### **(Mjere osiguranja kontrole razmnožavanja)**

- (1) Vlasnici kućnih ljubimaca moraju osigurati kontrolu razmnožavanja pod njihovim nadzorom, a za svu mladunčad snose odgovornost te nekontrolisano razmnožavanje svojih ljubimaca moraju spriječiti.
- (2) Kontrola razmnožavanja kućnog ljubimca provodi se preventivnim djelovanjem te ukoliko vlasnik kućnog ljubimca odluči može se izvršiti sterilizacija ili kastracija životinja.
- (3) Vlasnik kućnog ljubimca odgovoran je za svu mladunčad kućnog ljubimca te istu mora zbrinjavati u skladu sa važećim propisima o zaštiti životinja.
- (4) Ako vlasnik ili imalac kućnog ljubimca ne želi samostalno zbrinuti mladunčad kućnog ljubimca, dužan je snositi troškove njihovog zbrinjavanja.

## **DIO ČETVRTI - KRETANJE KUĆNIH LJUBIMACA NA JAVNIM POVRŠINAMA**

### **Član 16.**

#### **(Obaveze vlasnika kod izvođenja pasa na javne površine)**

- (1) Po javnim površinama na području grada Bihaća vlasnik je psa dužan voditi na povodcu tako da ne ugrožava ličnu sigurnost ljudi i drugih životinja i njihovo kretanje.
- (2) Izvođenje opasnog psa na javne površine dopušteno je jedino s brnjicom i na povodcu, od strane vlasnika a u skladu sa Pravilnikom o držanju opasnih životinja (“Službeni glasnik BiH”, broj: 27/10).
- (3) Pas koji se izvodi na javnu površinu mora imati propisanu ispravu o registraciji pasa, koju je na zahtjev komunalnog redara ili komunalnog inspektora vlasnik psa dužan pokazati.
- (4) Vlasniku/imaocu neregistriranog i neoznačenog (mikročipom) psa je zabranjeno izvoditi psa na javnu površinu.

### **Član 17.**

#### **(Zabrana dovođenja i kretanja kućnih ljubimaca u određenim objektima)**

- (1) Zbog zdravstvenih higijenskih i drugih razloga zabranjeno je dovoditi kućne ljubimce u objekte javne namjene, banke, tržnice, vozila javnog prijevoza, trgovine, ugostiteljske objekte, dječija igrališta, sportske terene, sajmove, javne skupove, kupališta, groblja i slično.
- (2) O dozvoli ili zabrani uvođenja kućnih ljubimaca u hotele, apartmane, i druge smještajne i ugostiteljske objekte, obrtničke radnje i trgovine neprehrambenim

proizvodima, odlučuje vlasnik objekta i to označava postavljanjem naljepnice sa likom psa ili mačke odnosno s prekrštenim likom psa ili mačke, na ulazna vrata u objekat.

- (3) Ograničenje kretanja kućnih ljubimaca ne primjenjuje se na pse osposobljene za pomoć licima sa posebnim potrebama, izuzev u slučaju kada je ograničenje utvrđeno posebnim propisom.

#### **Član 18.**

##### **(Dozvola dovođenja i kretanja kućnih ljubimaca uz saglasnost)**

Vlasnik kućnog ljubimca može se sa kućnim ljubimcem kretati na sportskim i rekreacijskim terenima i javnim kupalištima uz pismenu saglasnost vlasnika objekta ili pravnog lica koje rukovodi objektom i to označava postavljanjem naljepnice sa likom psa ili mačke odnosno s prekrštenim likom psa ili mačke.

#### **Član 19.**

##### **(Obaveze vlasnika kućnog ljubimca kod onečišćenja površine i prostora)**

- (1) Ukoliko pas ili mačka pri izvođenju iz stana ili dvorišta, iz bilo kojih razloga onečisti stazu, put, zelenu površinu ili drugi prostor, vlasnik psa ili mačke dužan je da onečišćenu površinu očisti.
- (2) Vlasnik kućnog ljubimca prilikom izvođenja kućnog ljubimca dužan je sa sobom imati pribor za čišćenje i uklanjanje izmeta.
- (3) Ako pas ili mačka ošteti nečiju imovinu, vlasnik životinje je dužan izvršiti popravku ili nadoknaditi materijalnu štetu oštećenom fizičkom ili pravnom licu.

#### **Član 20.**

##### **(Obaveze vlasnika kućnog ljubimca)**

- (1) Vlasnik psa dužan je obezbijediti sve potrebne uvjete da se pas ne može samostalno udaljiti iz dvorišta, okućnice ili drugog zemljišta na kojem drži psa.
- (2) Zabranjeno je puštanje psa na javne i druge površine bez nadzora.
- (3) Vlasnik izgubljenog kućnog ljubimca dužan je nadoknaditi svaku štetu koju počinu takav kućni ljubimac, od momenta njegovog nestanka do momenta njegovog pronalaska i vraćanja vlasniku.

### **DIO PETI - POSTUPANJE SA NAPUŠTENIM I IZGUBLJENIM PSIMA**

#### **Član 21.**

##### **(Postupanje sa napuštenim i izgubljenim psima)**

- (1) Neregistrirane pse nepoznatih vlasnika, napuštene i izgubljene pse sakuplja higijenski servis/sklonište za životinje kojeg u skladu sa Zakonom osniva fizičko ili pravno lice, grad ili kanton.

- (2) Ukoliko higijenski servis utvrdi podatke o vlasniku napuštenog ili izgubljenog psa, o istom će obavijestiti nadležnu komunalnu inspekciju grada Bihaća, radi daljeg poduzimanja mjera u skladu sa ovom Odlukom.

## **Član 22.**

### **(Troškovi kod postupanja sa napuštenim i izgubljenim psima)**

Troškove hvatanja, prevoza, prihvata, veterinarsko-zdravstvenih mjera i eutanazije, što ih je higijenski servis/sklonište za životinje poduzelo prema neregistriranim, napuštenim i izgubljenim psima snosi njihov vlasnik, ako je poznat ili se naknadno utvrdi, a ako nije poznat troškovi se u skladu sa Zakonom o zaštiti dobrobiti životinja, podmiruju iz Budžeta Grada Bihaća i drugih Zakonom propisanih vidova finansiranja.

## **Član 23.**

### **(Postupanje nadležnih institucija kod napuštenih pasa)**

Dok tijela predviđena Zakonom o zaštiti dobrobiti životinja ("Službeni glasnik Bosne i Hercegovine", broj: 25/09) ne osnuju skloništa za životinje, JP "Veterinarska stanica" d.o.o. Bihać će u saradnji sa JKP "Komrad" d.o.o. Bihać, u cilju stabilizacije napuštenih pasa, obavljati poslove hvatanja, prevoza, kastracije, sterilizacije, veterinarsko-zdravstvene zaštite i obilježavanje napuštenih pasa, udomljavanje, njihovo smještanje i nadzor u privremenom skloništu za životinje osnovano Odlukom o osnivanju i organizaciji rada privremenog skloništa za životinje na području općine Bihać ("Službeni glasnik općine Bihać", broj: 07/12) i Odlukom o nastavku rada privremenog skloništa za životinje na području općine Bihać ("Službeni glasnik općine Bihać", broj: 12/13,15/15 i 2/17).

## **Član 24.**

### **(Zbrinjavanje napuštenih ili izgubljenih pasa)**

- (1) Ukoliko pravno lice, koje je registrirano za zaštitu i dobrobit životinja, želi zbrinuti napuštene ili izgubljene pse, dozvoljeno je držanje najviše do 30 pasa, pod uvjetima koje propisuje Zakon o zaštiti i dobrobiti životinja i Pravilnik o zaštiti pasa koji se drže kao kućni ljubimci.
- (2) Pravno lice, koje je registrirano za zaštitu i dobrobit životinja, a želi zbrinuti napuštene ili izgubljene pse, u obavezi je za napuštene ili izgubljene pse obezbijediti slijedeće:
- a) odgovarajuću nastambu i opremu za smještaj pasa;
  - b) veterinarsko-zdravstvenu zaštitu i nadzor, sterilizaciju/kastraciju, označavanje mikročipom i registraciju pasa;
  - c) voditi evidenciju o psima (primljenim psima: vrijeme prijema psa, spol, težina, broj identifikacijske oznake ukoliko je pas označen, prosudba starosti, inicijalno opažanje o zdravstvenom stanju, fotografija psa, mjesto na koje je pronađen pas; udomljenim psima ili upućenim u drugu nastambu: datum udomljavanja, adresa i broj telefona udomitelja; steriliziranim/kastriranim psima: datum zahvata;

- mikročipiranim psima; puštenim na mjesto nalazišta: lokacija i broj ušne markice; uginulim ili usmrćenim: razlog, datum, potpis i pečat veterinara; zdravstvenom stanju pasa;) i redovito obnavljati evidencije; na zahtjev komunalne ili veterinarske inspekcije dužni su dati evidencije na uvid;
- d) lokacija za držanje pasa mora biti izvan urbanog područja, odnosno udaljena najmanje 250-300 metara od naseljenog mjesta za objekte koji zbrinjavaju do 10 pasa, odnosno preko 300 metara za objekte koji zbrinjavaju maksimalno do 30 pasa. Lokacije ovih objekata ne smiju narušavati rad i cjelovitost već postojećih nastambi i onečišćavati okoliš, te isto tako lokacije moraju biti i ograđene čvrstom ogradom.
  - e) kod zbrinjavanja pasa sa područja grada Bihaća primjenjivati praksu preferiranja zbrinjavanja pasa sa urbanih područja grada Bihaća i oko školskih objekata.
- (3) Ukoliko pravno lice iz stava (1) i (2) ovog člana želi izvršiti udomljavanje pasa trećim licima, mora posjedovati odgovarajuće dozvole i poštivati sve zakone koji reguliraju ovu oblast.

#### **Član 25.**

##### **(Sufinansiranje)**

Grad Bihać, u skladu sa svojim finansijskim mogućnostima, i u cilju zaštite i dobrobiti napuštenih i izgubljenih pasa, može sufinancirati pravna lica, koja su registrirana za zaštitu i dobrobit životinja, i koji zbrinu i udome napuštene i izgubljene pse.

#### **Član 26.**

##### **(Troškovi vlasnika kod skupljanja prekobrojnih vlasničkih pasa)**

Sakupljanje, prevoz i prihvata prekobrojnih vlasničkih pasa u postupku prisilnog izvršenja rješenja gradskog komunalnog inspektora vrši JP "Veterinarska stanica" d.o.o. Bihać u saradnji sa JKP "Komrad" d.o.o. Bihać, na trošak vlasnika pasa.

### **DIO PETI – NADZOR NAD PROVOĐENJEM ODLUKE**

#### **Član 27.**

##### **(Inspekcijski nadzor)**

- (1) Komunalna inspekcija Grada Bihaća, u skladu sa svojim ovlaštenjima, vrši nadzor na provođenjem odredaba člana 6., 7., 8., 9., 10., 11., 12., 13., 16., 17., 18., 19., 20. i 24. ove Odluke.
- (2) Kantonalna uprava za inspekcijske poslove USK-a, Veterinarska inspekcija, u okviru svojih ovlaštenja, vrši nadzor u slučajevima kršenja odredaba ove Odluke koje su uređene Zakonom o veterinarstvu i Zakonom o zaštiti i dobrobiti životinja.
- (3) Policijska uprava Bihać, u okviru svojih ovlaštenja, vrši nadzor u slučajevima kršenja odredaba ove Odluke koje su uređene Zakonom o javnom redu i miru i Odlukom o

javnom redu i miru.

### **Član 28.**

#### **(Pomoć u radu nadležnih organa i preduzeća)**

Komunalni inspektori, komunalni redari i zaposlenici JP "Veterinarska stanica" d.o.o. Bihać i JP „Komrad“ d.o.o. Bihać u svom radu u provođenju ove Odluke mogu zatražiti pomoć Ministarstva unutrašnjih poslova Unsko-sanskog kantona, Policijska uprava Bihać.

## **DIO ŠESTI - KAZNENE ODREDBE**

### **Član 29.**

#### **(Prekršaji za pravna lica)**

Novčanom kaznom u iznosu od 500,00 KM do 2.000,00 KM kaznit će se za prekršaj pravno lice ako postupi u suprotnosti sa članom 6., 7., 8., 9., 10., 11., 12., 14., 15., 20. i 24. ove Odluke.

### **Član 30.**

#### **(Prekršaji za odgovorno lice u pravnom licu)**

Novčanom kaznom u iznosu od 300,00 KM do 1.500,00 KM kaznit će se za prekršaj odgovorno lice u pravnom licu, ako postupi u suprotnosti sa članom 6., 7., 8., 9., 10., 11., 12., 14., 15., 20. i 24. ove Odluke.

### **Član 31.**

#### **(Prekršaji za fizička lica)**

- (1) Novčanom kaznom u iznosu od 300,00 KM do 900,00 KM kaznit će se za prekršaj fizičko lice ako postupi u suprotnosti sa članom 6., 7., 8., 9., 10., 11., 12., 14., 15. i 24. ove Odluke.
- (2) Novčanom kaznom u iznosu od 50,00 KM do 150,00 KM kaznit će se za prekršaj fizičko lice ako postupi u suprotnosti sa članom 17. i 19. ove Odluke.

### **Član 32.**

#### **(Ostali prekršaji)**

Za prekršaje koji su utvrđeni članom 13. i članom 16. ove Odluke, primjenjuju se kaznene odredbe propisane Odlukom o javnom redu i miru.

## **DIO SEDMI- PRELAZNE I ZAVRŠNE ODREDBE**

### **Član 33.**

#### **(Rok za donošenje Pravilnika)**

Pravilnik o sufinansiranju pravnih lica koja su registrirana za zaštitu i dobrobit



životinja iz člana 24. ove Odluke donijet će Gradonačelnik u roku od 30 dana od dana stupanja na snagu ove Odluke.

#### **Član 34.**

##### **(Prestanak važenja Odluke)**

Danom stupanja na snagu ove Odluke prestaje da važi Odluka o načinu držanja i zaštiti pasa i mačaka kao kućnih ljubimaca ("Službeni glasnik općine Bihać", broj: 07/17, 13/17).

#### **Član 35.**

##### **(Stupanje na snagu Odluke)**

Ova Odluka stupa na snagu osmog dana od dana objavljivanja u Službenom glasniku Grada Bihaća.

Gradsko vijeće  
Broj:  
Bihać, 2021.godine

Predsjedavajući Gradskog vijeća  
Zulfikar Handukić



# SLUŽBENI GLASNIK

## GRADA BIHAĆA

Broj 7 / 2017.

8. maja 2017.  
BIHAĆ

Izdanje na bosanskom  
jeziku

87.

Na osnovu člana 12. stav (3) alineja z) Zakona o lokalnoj samoupravi Unsko-sanskog kantona ("Službeni glasnik Unsko-sanskog kantona", broj 8/11 ) i člana 35. alineja c) Statuta Grada Bihaća ("Službeni glasnik Grada Bihaća", broj: 13/15), Gradsko vijeće Bihać, na 9. sjednici održanoj dana 04.05.2017 godine, donosi:

### ODLUKU

#### O NAČINU DRŽANJA I ZAŠTITI PASA I MAČAKA KAO KUĆNIH LJUBIMACA

#### DIO PRVI - OPĆE ODREDBE

##### Član 1.

(1) Odlukom se propisuju uslovi, način držanja i zaštita pasa i mačaka kao kućnih ljubimaca, način kontrole njihovog razmnožavanja, kretanje u objektima i na površinama javne namjene, način postupanja sa neregistriranim psima, napuštenim i izgubljenim životinjama na području Grada Bihaća.

(2) Ovom Odlukom naročito se propisuje broj i način držanja pasa i mačaka, registracija, obilježavanje, preventivna cijepjenja, kao i način uklanjanja pasa i mačaka s ciljem zaštite zdravlja ljudi, sigurnosti građana i zaštita životne sredine.

##### Član 2.

Na području Grada Bihaća mogu se u skladu sa ovom Odlukom držati kućni ljubimci koji ne ugrožavaju fizički i psihički integritet, ličnu sigurnost i imovinu građana, ne remete javni red i mir, ne izazivaju osjećaj straha, pri čemu uslovi držanja moraju u potpunosti zadovoljavati njihovu dobrobit.

##### Član 3.

Odredbe ove odluke ne odnose se na životinje koje služe za potrebe Ministarstva unutrašnjih poslova i Ministarstva odbrane BiH, službene pse i pse vodiče osoba sa posebnim potrebama kao i lovačke pse koji su registrovani i pod nadzorom vlasnika.

##### Član 4.

Pojedini pojmovi navedeni u Odluci imaju sljedeća značenja:

- a) kućni ljubimci (u ovoj Odluci pas i mačka) su životinje koje čovjek drži zbog društva, zaštite i pomoći ili zbog zanimanja za tu životinju;
- b) imalac ili vlasnik životinje je fizičko ili pravno lice koje je vlasnik životinje, ili bilo koje drugo lice koje je stalno ili povremeno:
  - 1) vlasnik životinje;
  - 2) odgovorno ili zaduženo za životinju;
  - 3) odgovorno za čuvanje i kontrolu djece mlađe od 16 godina koja posjeduju životinju, odnosno koja se bave uzgajanjem, zaštitom, upotrebom,

- gajenjem, upravljanjem, obučavanjem, prijevozom ili prodajom životinje;
- c) izgubljena životinja je ona životinja koja je napustila vlasnika bez njegove volje i on je traži;
  - d) napuštena životinja je kućna životinja koju je vlasnik svjesno napustio;
  - e) psi i mačke litalice su životinje kojima je vlasnik nepoznat ;
  - f) opasan pas je bilo koja jedinka te vrste, koja je ničim izazvana, napala čovjeka ili drugu životinju i nanijela im fizičke povrede;
  - g) neupisani psi u Registar pasa su svi psi poznatog ili nepoznatog vlasnika ili imaoca životinje koji nisu upisani u Registar u skladu sa zakonom;
  - h) higijenski servis je služba za prikupljanje napuštenih, izgubljenih i uginulih životinja, koji osnivaju pravna lica u skladu s odredbama Zakona o zaštiti i dobrobiti životinja;
  - i) skloništa za životinje su prostori u kojima se smještaju pronađene (napuštene i izgubljene) životinje na daljnju brigu i moguće udomljavanje;

## DIO DRUGI - USLOVI, NAČIN DRŽANJA I ZAŠTITA KUĆNIH LJUBIMACA

### Član 5.

(1) Na području grada Bihaća, svaka punoljetna osoba pridržavajući se odredbi Zakona o zaštiti dobrobiti životinja i odredbi ove Odluke može držati kućne ljubimce.

(2) Držanje opasnih životinja kao kućnih ljubimaca regulirano je Pravilnikom o držanju opasnih životinja ("Službeni glasnik Bosne i Hercegovine" broj 27/10).

### Član 6.

Vlasnik kućnog ljubimca mora imati propisanu ispravu o upisu kućnog ljubimca kod nadležne veterinarske organizacije koja vodi registar životinja, a koju je na zahtjev veterinarskog inspektora, komunalnog inspektora, komunalnog redara ili drugog službenog lica dužan pokazati.

### Član 7.

(1) Vlasnik kućnog ljubimca dužan je brinuti o njegovom zdravlju, ishrani, smještaju, higijeni, i prema njemu postupati u skladu sa Zakonom i drugim propisima o zaštiti i dobrobiti životinja, veterinarstva, zaštite okoliša, javnog reda i mira, te odredbama ove Odluke.

(2) Vlasnik kućnog ljubimca koji se više o njemu ne može brinuti u skladu sa stavom (1) ovog člana dužan je pronaći udomitelja, odnosno udruženje građana ili osobu koja će o njemu brinuti na propisan način ili ga predati Skloništu za

životinje, kojeg u skladu sa Zakonom osniva fizička ili pravna osoba, općina, grad, kanton ili entitet te snositi troškove boravka do udomljenja ili drugog načina zbrinjavanja životinje.

### Član 8.

(1) Vlasnik kućnog ljubimca dužan je osigurati da kućni ljubimac ni na jedan način ne ometa javni red i mir, uslove stanovanja, utvrđeni kućni red i mir građana, te da ne ugrožava sigurnost građana i sigurnost drugih životinja.

(2) U slučaju odsutnosti duže od 24 sata vlasnik je dužan osigurati nadzor i brigu punoljetne osobe za svog kućnog ljubimca u skladu sa njegovim potrebama.

### Član 9.

(1) Nije dozvoljeno držati ili ostavljati kućnog ljubimca u zajedničkim prostorijama zgrade (ulazi, stubišta, liftovi, podrumi, prostorije za odlaganje smeća, kotlovnice, sušionice i slično).

(2) Za držanje kućnog ljubimca u zajedničkom dvorištu zgrade ili zgrada, vlasnik mora imati saglasnost svih suvlasnika ili vlasnika zgrade ili drugog zakonskog posjednika dvorišta.

(3) Vlasnik kućnog ljubimca dužan je brinuti o čistoći zajedničkih prostorija kojima se kreću kućni ljubimci, te očistiti površinu ukoliko je njegov kućni ljubimac na bilo koji način onečistio površinu.

### Član 10.

(1) U stambenoj zgradi sa više stanova dozvoljeno je držanje u stanu najviše jednog psa odnosno najviše dvije mačke.

(2) Štenad odnosno mačići mogu se držati najduže 3 (tri) mjeseca nakon okota.

(3) Nije dozvoljeno držanje psa ili mačke na balkonu, terasi ili lođi stambene zgrade sa više stanova.

### Član 11.

(1) U porodičnoj kući ili dvorištu porodične kuće dozvoljeno je držati najviše dva (2) psa i dvije (2) mačke na način da ne ometaju red i mir građana.

(2) Izuzetno vlasnik kućnih ljubimaca, može držati više od dva psa i dvije mačke ako ima:

- a) registrirano leglo za reprodukciju pasa i mačaka
- b) ako vrši uzgoj podmlatka
- c) ako posjeduje stado ovaca (na sto grla jedan ovčarski pas)
- d) ako vrši dresuru pasa
- e) ako organizira izložbe, smotre i takmičenja pasa i mačaka

f) ako je aktivni član lovačke organizacije, i posjeduju lovačke pse koji su upisani u evidencijsku knjigu nadležne lovačke organizacije.

(3) Za sve navedene djelatnosti iz prethodnog stava, vlasnik kućnog ljubimca mora imati odobrenje nadležnog organa.

(4) Pas koji se drži u neograđenom dvorištu mora biti vezan lancem na način da ne ometa kretanje i sigurnost građana ili biti smješten u ograđeni prostor - boks, koji će osigurati životinji da se samostalno ne može udaljiti.

(5) Vlasnik ne smije vezati psa na lanac koji je kraći od tri (3) metra ili trostruke dužine životinje, mjereno od vrha repa do vrha njuške.

### Član 12.

(1) Ukoliko se pas drži u ograđenom prostoru za psa ili kućici za psa, smještaj kućice ili ograđenog prostora mora biti takav da ne ometa stanovanje u susjednom dvorištu. Kućica ili prostor za držanje psa mora biti udaljena najmanje 1,5 metara od susjednog objekta za stanovanje.

(2) Pas koji se drži u ograđenom dvorištu, okućnici ili drugom zemljištu ne mora biti vezan ukoliko ograda visinom i čvrstoćom osigurava sigurnost prolaznika i susjeda, na ulaznim dvorišnim vratima mora biti zvono u ispravnom stanju, te na vidnom mjestu istaknuta oznaka koja upozorava na prisustvo psa.

### Član 13.

(1) Vlasnik čiji pas učestalim i dugotrajnim lajanjem ili zavijanjem remeti mir građana, obavezan je po pritužbi građana odmah poduzeti odgovarajuće mjere kako bi se spriječilo daljnje uznemiravanje građana ili je dužan odmah umiriti psa na način koji životinji neće uzrokovati bol, patnju ili strah.

(2) U suprotnom, u okviru svojih ovlaštenja, a po prijavi građana, postupit će komunalni redar.

## DIO TREĆI - REGISTRACIJA I NAČIN KONTROLE RAZMNOŽAVANJA KUĆNIH LJUBIMACA

### Član 14.

(1) Dozvoljeno je držanje kućnih ljubimaca koji su registrovani, označeni s pomoću mikročipa i cijepljeni.

(2) Registraciju i označavanje pomoću mikročipa provodi JP "Veterinarska stanica" d.o.o.Bihać dok cijepljenje i provođenje drugih propisanih veterinarsko-zdravstvenih mjera u skladu sa Zakonom o veterinarstvu i Zakonom o dobrobiti životinji pored JP "Veterinarska stanica"

d.o.o. mogu obavljati i druge nadležne veterinarske organizacije.

(3) JP "Veterinarska stanica" d.o.o.Bihać vodi upisnik životinja i izdaje službenu ispravu za životinju (do primjene Pravilnika o identifikaciji i vođenju evidencije pasa, mačaka i pitomih vretica) a sve veterinarske organizacije koje provode cijepljenje i druge propisane veterinarsko zdravstvene mjere pasa i mačaka u obavezi su pravovremeno dostavljati podatke JP "Veterinarska stanica" d.o.o. Bihać.

(4) Vlasnici pasa dužni su prijaviti nabavku odnosno uginuće ili otuđenje psa u roku od 7 dana od dana nabavke, uginuća ili otuđenja psa veterinarskoj organizaciji koja vodi upisnik.

(5) Troškove registracije kućnih ljubimaca, označavanja – čipovanja, provođenja propisanih veterinarsko-zdravstvenih mjera i izdavanja službenih isprava /dokumentacije, snosi vlasnik u skladu sa Zakonom o veterinarstvu ("Službene novine Federacije Bosne i Hercegovine" broj 46/00) .

### Član 15.

(1) Vlasnici kućnih ljubimaca moraju osigurati kontrolu razmnožavanja pod njihovim nadzorom, a za sve potomke snose odgovornost i nekontrolisano razmnožavanje svojih ljubimaca moraju spriječiti.

(2) Kontrola razmnožavanja kućnog ljubimca provodi se preventivnim djelovanjem te ukoliko vlasnik kućnog ljubimca odluči može se izvršiti sterilizacija ili kastracija životinja.

(3) Vlasnik kućnog ljubimca odgovoran je za svu mladunčad kućnog ljubimca koju mora zbrinjavati u skladu sa propisima o zaštiti životinja.

(4) Ako vlasnik ili imalac kućnog ljubimca ne želi samostalno zbrinuti mladunčad kućnog ljubimca, dužan je snositi troškove njihovog zbrinjavanja.

## DIO ČETVRTI - KRETANJE KUĆNIH LJUBIMACA NA JAVNIM POVRŠINAMA

### Član 16.

(1) Po javnim površinama na području grada Bihaća vlasnik je psa dužan voditi na povodcu sa zaštitnom brnjicom tako da ne ugrožava osobnu sigurnost ljudi i drugih životinja i njihovo kretanje.

(2) Psi patuljastih pasmina i oni koji zbog anatomske neprikladne građe glave ili čeljusti ne mogu nositi brnjicu mogu se izvoditi samo na uzici.

(3) Izvođenje opasnog psa na javne površine dopušteno je jedino s brnjicom i na povodcu, od strane vlasnika a u skladu sa Pravilnikom o držanju opasnih životinja ("Službeni glasnik BiH", broj: 27/10).

(4) Pas koji se izvodi na javnu površinu mora imati propisanu ispravu o registraciji pasa, koju je na zahtjev komunalnog redara ili komunalnog inspektora vlasnik psa dužan pokazati.

#### Član 17.

(1) Zbog zdravstvenih higijenskih i drugih razloga zabranjeno je dovesti kućne ljubimce u objekte javne namjene, banke, tržnice, vozila javnog prijevoza, trgovine, ugostiteljske objekte, dječija igrališta, sportske terene, sajmove, javne skupove, kupališta, groblja i slično.

(2) O dozvoli ili zabrani uvođenja kućnih ljubimaca u hotele, apartmane, i druge smještajne i ugostiteljske objekte, obrtničke radnje i trgovine neprehrambenim proizvodima, odlučuje vlasnik i to označava postavljanjem naljepnice sa likom psa ili mačke odnosno s prekriženim likom psa ili mačke, na ulazna vrata u objekat.

(3) Ograničenje kretanja kućnih ljubimaca ne primjenjuje se na pse osposobljene za pomoć osobama sa posebnim potrebama, izuzev u slučaju kada je ograničenje utvrđeno posebnim propisom.

#### Član 18.

Vlasnik kućnog ljubimca može se sa kućnim ljubimcem kretati na sportskim i rekreacijskim terenima i javnim kupalištima uz pismenu saglasnost vlasnika ili pravne osobe koja rukovodi objektom i to označava postavljanjem naljepnice sa likom psa ili mačke odnosno s prekriženim likom psa ili mačke.

#### Član 19.

(1) Ukoliko pas ili mačka pri izvođenju iz stana ili dvorišta, iz bilo kojih razloga onečisti stazu, put, zelenu površinu ili drugi prostor, vlasnik psa ili mačke dužan je da onečišćenu površinu očisti.

(2) Vlasnik kućnog ljubimca prilikom izvođenja kućnog ljubimca dužan je sa sobom imati pribor za čišćenje i uklanjanje izmeta.

(3) Ako pas ili mačka ošteti nečiju imovinu, vlasnik životinje je dužan izvršiti popravku ili nadoknaditi materijalnu štetu oštećenom fizičkom ili pravnom licu.

### DIO PETI - POSTUPANJE SA NAPUŠTENIM I IZGUBLJENIM PSIMA

#### Član 20.

Neupisane pse nepoznatih vlasnika, napuštene i izgubljene životinje sakuplja higijenski servis/sklonište za životinje kojeg u skladu sa Zakonom osnuje fizička ili pravna osoba, grad ili kanton.

#### Član 21.

Troškove hvatanja, prevoza, prihvata, veterinarsko-zdravstvenih mjera i eutanazije što ih je higijenski servis/sklonište za životinje poduzelo prema neregistriranim, napuštenim i izgubljenim psima snosi njihov vlasnik, ako je poznat ili se naknadno utvrdi, a ako nije poznat troškovi se u skladu sa Zakonom o zaštiti dobrobiti životinja, podmiruju iz Budžeta Grada Bihaća i drugih Zakonom propisanih vidova finansiranja.

#### Član 22.

Dok tijela predviđena Zakonom o zaštiti dobrobiti životinja ("Službeni glasnik Bosne i Hercegovine", broj 25/09) ne osnuju skloništa za životinje, JP "Veterinarska stanica" d.o.o. Bihać će u saradnji sa JKP "Komrad" d.o.o. Bihać, u cilju stabilizacije napuštenih životinja, obavljati poslove hvatanja, prevoza, kastracije, sterilizacije, veterinarsko-zdravstvene zaštite i obilježavanje napuštenih životinja, udomljavanje, njihovo smještanje i nadzor u privremenom skloništu za životinje osnovano Odlukom o osnivanju i organizaciji rada privremenog skloništa za životinje na području općine Bihać ("Službeni glasnik općine Bihać", broj 07/12) i Odlukom o nastavku rada privremenog skloništa za životinje na području općine Bihać ("Službeni glasnik općine Bihać", broj 12/13,15/15 i 2/17).

#### Član 23.

(1) Vlasnik psa dužan je obezbijediti sve uvjete da se pas ne može samostalno udaljiti iz dvorišta, okućnice ili drugog zemljišta na kojem drži psa.

(2) Zabranjeno je puštanje psa na javne i druge površine bez nadzora.

(3) Vlasnik izgubljenog kućnog ljubimca dužan je nadoknaditi svaku štetu koju počinu takav kućni ljubimac, od momenta njegovog nestanka do momenta njegovog pronalaska i vraćanja vlasniku.

### DIO PETI - NADZOR

#### Član 24.

Nadzor nad provođenjem odredaba ove Odluke u okvirima svojih ovlaštenja vrši :



Služba za komunalne djelatnosti, vode, zaštitu okoliša i inspeksijske poslove putem gradskog komunalnog inspektora, kojem u vršenju inspeksijskog nadzora pomažu komunalni redar, Ministarstvo unutrašnjih poslova Unsko - sanskog kantona, Policijska uprava Bihać i Veterinarska inspekcija USK-a, svako u okvirima svojih ovlaštenja.

#### Član 25.

Ako komunalni redari i uposlenici JP "Veterinarska stanica" d.o.o. Bihać, u svom radu naiđe na otpor, mogu zatražiti pomoć pripadnika Ministarstva unutrašnjih poslova Unsko sanskog kantona, Policijska uprava Bihać.

### DIO ŠESTI - KAZNENE ODREDBE

#### Član 26.

Novčanom kaznom u iznosu od 500,00 KM do 2.000,00 KM kazniće se za prekršaj pravno lice ako postupi u suprotnosti sa članom 6., 7., 8., 9., 10., 11., 12., 13., 14., 15., 23., 24., ove Odluke.

#### Član 27.

Novčanom kaznom u iznosu od 300,00 KM do 1.500,00 KM kazniće se za prekršaj odgovorno lice u pravnom licu, ako postupi u suprotnosti sa članom 6., 7., 8., 9., 10., 11., 12., 13., 14., 15., 23., ove Odluke.

#### Član 28.

Novčanom kaznom u iznosu od 300,00 KM do 900,00 KM kazniće se za prekršaj fizičko lice ako postupi u suprotnosti sa članom 6., 7., 8., 9., 10., 11., 12., 13., 14., 15., 23., ove Odluke.

#### Član 29.

Novčanom kaznom u iznosu od 50,00 KM do 150,00 KM kazniće se za prekršaj fizičko lice ako postupi u suprotnosti sa članom 16., 17., 19., ove Odluke.

### DIO SEDMI- ZAVRŠNE ODREDBE

#### Član 30.

Danom stupanja na snagu ove Odluke prestaje da važi Odluka o uslovima i načinu držanja kućnih ljubimaca na području općine Bihać ("Službeni glasnik općine Bihać", broj 10/11).

#### Član 31.

Ova Odluka stupa na snagu osmog dana od dana objavljivanja u Službenom glasniku Grada Bihaća.

Broj: GV-02-3340  
4. maja 2017. godine  
Bihać

Predsjedavajući  
Gradskog vijeća  
Davor Župa, s.r.

#### 88.

Na osnovu člana 14. stav 4. Zakona o eksproprijaciji ("Službene novine Federacije BiH", broj: 70/07, 36/10, 25/12 i 34/16) i člana 35. tačka c.) Statuta grada Bihaća ("Službeni glasnik Grada Bihaća", br. 13/15), Gradsko vijeće Bihać na 9. sjednici održanoj dana 04.05.2017 godine, donosi:

### ODLUKU

**O UTVRĐIVANJU JAVNOG INTERESA ZA  
NEPOTPUNU EKSPROPRIJACIJU  
NEKRETNINA USTANOVLJENJEM  
SLUŽNOSTI RADI IZGRADNJE  
NADZEMNOG 10(20) DALEKOVODA DV  
10(20)KV - DIONICA 3716-3774 "MUSLIĆI 3"  
I TS 10(20)/0,4 KV "MUSLIĆI 3" GRAD  
BIHAĆ U KORIST JP ELEKTROPRIVREDA  
BIH D.D. SARAJEVO, PODRUŽNICA  
"ELEKTRODISTRIBUCIJA" BIHAĆ**

#### I

Utvrđuje se da je od javnog interesa izgradnja nadzemnog 10(20) dalekovoda DV 10(20)kV - dionica 3716-3774 "Muslići 3" i TS 10(20)/0,4 kV "Muslići 3" Grad Bihać te da se u tu svrhu može pristupiti nepotpunoj eksproprijaciji nekretnina označenih kao:

- dio u površini od 242,70 m<sup>2</sup> od k.č. br. 884/1 zv. "Brijeg" oranica/njiva 5. klase površine 3848 m<sup>2</sup> i oranica/njiva 4. klase površine 3078 m<sup>2</sup> upisana u posjedovni list br. 517 k.o. Papari-Muslići kao suposjed Selmanović (Hasana) Enesa sa dijelom 3/7, Selmanović (Hasana) Ibri sa dijelom 3/14, Selmanović (Šere) Hadije sa dijelom 3/14 i Verl (Hasana) Azre rođ. Selmanović sa dijelom 1/7 po novom katastarskom operatu, a kojoj po starom katastarskom operatu odgovara dijelovi k.č. br. 598/1 oranica Brig površine 2100 m<sup>2</sup> upisana u zemljišnoknjižni uložak broj: 136 k.o. SP\_Papari kao Selmanović (Hasan) Enesa sa dijelom 6/14, Selmanović (Hasan) Ibri sa dijelom 3/14, Varl rođ. Selmanović Azre sa dijelom 2/14 i Selmanović (Šero) Hadije sa dijelom 3/14, k.č. br. 598/2 oranica Brijeg površine 1775 m<sup>2</sup> upisana u zemljišnoknjižni uložak br. 232 k.o. SP\_Papari kao vlasništvo Selmanović (Ibro) Hasana sa dijelom

**279.**

Na osnovu člana 132. tačka a), 142. i 143. Poslovnika Gradskog vijeća Bihać ("Službeni glasnik Grada Bihaća" broj: 3/16), Gradsko vijeće Bihać na 14. sjednici, održanoj dana 25.10.2017.godine, donosi :

**ZAKLJUČAK****O PRIHVATANJU NACRTA ODLUKE O OSNIVANJU TURISTIČKE ZAJEDNICE GRADA BIHAĆA****I**

Prihvata se Nacrt Odluke o osnivanju Turističke zajednice Grada Bihaća (u daljem tekstu: Nacrt Odluke)

**II**

Nacrt Odluke stavit će se na javni uvid građanima u periodu od 01.11. do 30.11. 2017. godine i to: u prostorijama Grada Bihaća – Info pult, u vremenu od 9,00 – 15,00 sati, objavom na web stranici Grada Bihaća, te dostavljanjem Nacrta Odluke: Ministarstvu privrede USK-a, Kantonalnoj upravi za inspeksijske poslove - turističko-ugostiteljskoj inspekciji, Privrednoj komori USK-a, Obrtničkoj komori USK-a, Ministarstvu zdravstva i socijalne politike USK-a, Ministarstvu obrazovanja, nauke, kulture i sporta USK-a, Turističkoj zajednici USK-a, JP Nacionalni park "Una" d.o.o. Bihać, JU Zavod za zaštitu kulturnog naslijeđa USK-a, JU "Kulturni centar" Bihać, JU za sport, odmor i rekreaciju Bihać i drugim pravnim i fizičkim licima koja se bave turističkom djelatnošću.

**III**

Prijedlozi, mišljenja i sugestije na Nacrt Odluke mogu se dostaviti u pisanoj formi do 30.11.2017 godine, radnom tijelu Gradskog vijeća kojeg čine:

1. Nedžad Mešić, gradski vijećnik
2. Zulfikar Handukić, gradski vijećnik
3. Jasmina Beširević, ispred nadležne Službe.

**IV**

Radno tijelo za provođenje javne rasprave dužno je naročito :

- a) osigurati da materijal, odnosno Odluka koja je predmet javne rasprave bude dostupna javnosti;
- b) pratiti javnu raspravu i pravovremeno prikupiti sve prijedloge, mišljenja i primjedbe koje se iznesu na javnoj raspravi;

- c) analizirati rezultate javne rasprave i o njima podnijeti izvještaj Vijeću i predlagачu materijala, odnosno učestvovati u javnoj raspravi.

**V**

Radno tijelo za provođenje javne rasprave održaće završnu javnu raspravu, dana 01.12.2017 godine u 9,00 sati u prisustvu svih zainteresiranih pravnih i fizičkih lica u gradskoj upravi Grada Bihaća.

**VI**

Predlagач će uzimajući u obzir prijedloge i mišljenja sadržane u izvještaju radnog tijela za provođenje javne rasprave, utvrditi Prijedlog Odluke o osnivanju Turističke zajednice Grada Bihaća i podnijeti je Gradskom vijeću na razmatranje i donošenje.

**VII**

Ovaj Zaključak stupa na snagu osmog dana od dana objavljivanja u Službenom glasniku Grada Bihaća.

Broj: GV-22-7169/17	Predsjedavajući
25. oktobra 2017. godine	Gradskog vijeća
B i h a ć	Davor Župa, s.r.

**280.**

Na osnovu člana 12. stav (3) alineja z) Zakona o lokalnoj samoupravi Unsko-sanskog kantona ("Službeni glasnik Unsko – sanskog kantona", broj: 8/11) i člana 35. alineja c) Statuta Grada Bihaća ("Službeni glasnik Grada Bihaća", broj: 13/15), Gradsko vijeće Bihać, na 14. sjednici održanoj dana 25.10.2017 godine, donosi:

**ODLUKU****O IZMJENAMA I DOPUNAMA ODLUKE NAČINU DRŽANJA I ZAŠTITI PASA I MAČAKA KAO KUĆNIH LJUBIMACA****Član 1.**

U Odluci o načinu držanja i zaštiti pasa i mačaka kao kućnih ljubimaca ("Službeni glasnik Grada Bihaća" broj 7/17) u dijelu I - Opće odredbe u članu 3. brišu se riječi "kao i lovačke pse."

**Član 2.**

U Odluci o načinu držanja i zaštiti pasa i mačaka kao kućnih ljubimaca ("Službeni glasnik

